

長樂縣志卷二十三

列傳三名臣

龔王之緒不能前論於陳周廉郭之才不得共稱於馬宋非僅限於制亦其度之相懸遠也賀氏志人物舉凡建一事澤一方與夫一官一吏之克稱其職者悉列於名臣一傳其弊似近於混彭氏則擇其定大計知大體氣度風節超越尋常者列為名臣餘則分列各傳體格嚴分際當矣茲仍取法彭氏其或不遺不濫歟傳名臣

唐

林慎思字虔中御史昇第五子與諸兄讀書籌嚴筮得蒙_三之觀_三

長樂縣志

卷二十三 列傳三

一

名臣

遂自號仲蒙子咸通十年第進士復中宏詞科賜其鄉曰芳桂里曰大宏由秘書省校書郎權尚書水部郎中乾符中羣盜蜂起百姓流殍僖宗日與宦者燕嬉慎思與莆田余鎬累疏切諫不納出為萬年令廣平元年黃巢陷長安慎思領兵出戰力不支欲自剄賊執之逼降慎思踞床大罵北面稽首遂遇害年三十七著有續孟子二卷仲蒙子三卷友人周岌匿慎思母與妻子及所著書南

旋乾隆賀志參
道光通志

宋

陸愷字疆仲祖廩慶歷二年諸科試中方畧為三班奉職四轉至左侍禁歷官河中府及建州南劍州汀州邵武軍五巡檢以母居京

師就監順成倉後出爲泉州兵馬監押父長賓由蔡州司理累遷大理寺丞愷自元豐末入太學元符三年登進士第調廬州司法郡守龔原待以殊禮已而侍御史彭汝霖祭酒白時中同薦試學官檄至愷曰吾困科舉二十餘年晚得一官朝廷不吾知欲使之裹飯復入場屋吾不能也卒辭不就秩滿薦遷通仕郎給事中劉正夫兼領外諸司辟愷管句文字值子渙調官濟南憐其少欲與之近乞監密州板橋鎮鎮瀕海商舶至多異國珍貨姦吏習爲姦欺漁取愷絲毫不贖以外諸司賞典轉奉議郎復以八寶恩轉承議郎逾年御史中丞石公弼辟爲檢法官吳執中爲御史中丞復以文學薦除太府寺丞明年遷司農寺丞時正夫爲中書侍郎薦

士三人以愷稱首賜對稱旨擢司勳員外郎車駕幸尙書省轉朝散郎遷光祿少卿正夫旣相除宗正少卿詔脩玉牒愷纂輯徽宗臨御以來政事之大者爲一書上之轉朝奉大夫會太常少卿缺員宰執以愷名啓擬命下數日侍御史張樸進對論事畢徽宗忽謂樸曰朕用陸愷奉常識其人否樸對愷老於儒學有士望徽宗深然之轉朝散大夫磨勘轉朝請大夫乞補外除直徽猷閣知均州關決庶務無鉅細劇易皆親之吏斂手不敢爲非俗素惰農不知灌溉之利愷出郊勸相民始盡力歲遂大稔嘗早禱龍祠三日不雨愷對神自咎未旋車大雨鄰郡飛蝗蔽地千里過均境輒弗下父老候愷出迎拜以手加額曰微公德化所格民其殍矣襄鄧

大饑仰粟於均郡人請閉糴愷曰今天下一家非秦晉比奚此疆
彼界之異轉輸相屬於道三舍法能士不知所歸愷聚生徒擇屬
吏之有學行者爲之師講肄課試悉視成均郡人爭獻腴田以資
其費愷復於暇日往臨諭以綱常大義士民編其治績爲均陽樂
十章宣和六年受代到闕除知泉州未行而卒年六十有五踐更
省事殆十年同進者袞袞登禁從愷回翔不出故列無淹滯之歎
嘗謂人曰吾學古入官期以報國利民顧天下事非輔相大臣不
得行非諫官御史不得言非侍從之臣不得與國論今久處朝行
無一毫袖殊非素志吾老矣得一郡爲朝廷布宣德意惠養小民
其可也遂抗章力請旣得郡治有成績如其言

道光通志 按縣
舊志選舉注云愷

長樂縣志

卷二十二

列傳三

三

名臣

縣西隅河南人
府志誤入候官

陸蘊字敦信登紹聖四年進士第爲太學春秋博士經廢員省改會
要所檢閱文字大觀中改太常少卿坐議原廟不合黜知贛州瑞
金縣政和初召還復前官累遷大司成擢御史中丞引門下侍郎
余深親嫌自列徽宗曰相避之法防有司不能盡公爾侍從吾所
信任豈得下同庶僚不許蘊嘗奏御筆一日數下而前後相違非
所以重命令輔相大臣宦官戚里賜第營築縱撤民居縣官市材
於民而不予直貴游子弟以從官領閑局奉朝請爲員猥多無益
於事又賜予過制中外用度多於賦入數幸私室乖尊卑之分亦
非臣下之福其言皆中時病宰相蔡京惡之會盛章以宣和殿學

士提舉崇福宮尋許朔望入朝蘊上疏力諫其非正為京所擠遂除龍圖待制知福州改建州加顯謨閣直學士引疾提舉鴻慶宮已而二浙用兵旁郡皆繕治守備蘊聞命就道使者劾為避事奪職稍復集英殿脩撰卒弟藻藻字敦禮登崇寧二年進士大觀中累遷給事中宣和初由列曹侍郎出知泉州召除顯謨閣直學士尋知福州靖康中坐事奪職建炎初復徽猷閣待制提舉西京嵩山崇福宮道光通志按通志蘊藻均作候官人縣舊志選舉有藻名而無蘊名註云藻西隅河南人府志誤入候官詳攷雍正通志紹聖四年選舉載蘊為陸宣子崇寧二年選舉亦載藻為陸宣子可知藻蘊二人係同胞兄弟也既屬同胞斷無異籍之理且查邑之西隅河南至今尚有陸姓者則舊志所載不為無因而所以獨缺蘊名者或當時載筆之遺漏歟茲因並收之林安上字民瞻號歸愚慎思八世孫嶼頭人大觀四年釋褐歷官國

長樂縣志

卷二十三

列傳三

四

名臣

子博士江東路監察御史吏部考功員外郎左史起居郎秘閣修撰福建路兵馬鈐轄安撫使直龍圖閣亳州明道官廣東路經畧使因劾丞相汪伯彥黃潛善誤國不聽遂致仕卒祀鄉賢乾隆賀志

黃瑀字德藻青山下人少刻苦為學家貧鬻麩於市輒挾書自隨登紹興八年進士補饒州司戶參軍提點鑄錢官欲市冶工餘糧以規利強瑀高其估瑀不可則怒欲中以法求瑀罪無所得乃反欲薦之瑀又謝不受歲旱州守洪皓檄視屬縣民田當免租者瑀請免之什九而行他縣者以什一告皓以為疑既而皓使視諸縣獨瑀所行縣民無流徙皓善瑀所為而薦之調湖北轉運司主管帳司改知永春縣遷兩浙轉運司幹辦公事有獻鬻公田之策者轉

運使檄瑀視之瑀歷諸郡稔知多寡輕重不均之弊極言其不便且曰公田歲入若干而畜牧芻藁取具焉今一旦鬻之計其獲不過數歲之入自後能無橫斂乎貴將楊存中請地廣宮實規爲觀遊以奉權幸瑀復被檄往視還曰營卒雖衆度地若干畝而足今所請地且數倍是壞民田廬冢墓而爲存中結驪於一倖臣也卒皆罷之權知秀州華亭縣值大饑白常平使者發廩以賑使者曰當俟奏報瑀曰民命在朝夕苟可以生之雖重得罪不悔退卽發常平廩賑之全活萬計吏部侍郎汪應辰侍御史汪澈交章薦瑀才除御史臺檢法官未幾擢監察御史會以病在告殿中侍御史杜莘老素與瑀以節義相勵一日來問疾連呼不應乃大聲曰吾

今日擊去王繼先矣瑀矍然起坐曰君能任職吾不病矣探枕中片紙示之所疏繼先罪狀甚悉蓋藁已具而未上者居無何莘老以論宦者張去爲不報求去瑀就與別喟然太息曰君厚自愛吾亦從此逝矣卽日上疏請外除江南東路提點刑獄徒轉運副使視事旬日改知漳州丐祠主管台州崇道觀乾道二年卒年六十瑀性剛介未嘗降色辭以希薦寵生平清苦自勵非人所堪然處兄弟族嫻周貧賑乏必竭其力卒之日家無餘財祀郡鄉賢祠子

杲東幹均見儒林傳

乾隆賀志參
道光通志

鄭丙字少融紹興十五年第進士充建州教授累轉國子監主簿孝宗卽位詔求直言丙上從諫遠佞勤政用人裕民練兵六事隆興

元年遷監察御史明年出提點荆湖北路刑獄改提舉湖南常平
茶鹽乾道元年宜章峒賊李金陷郴州焚桂陽軍柳與衡州密邇
提刑及常平俱置司在衡而提刑託行部以避賊鋒丙獨督州將
治城訓兵召世忠峒首領李昂霄率丁壯禦賊請發鄂渚軍協討
遂平之尋引疾丐祠主管台州崇道觀三年起爲成都府總運判
官宣撫使虞允文集四路寮屬議事器丙特甚暨還朝力薦丙可
用六年五月召除禮部員外郎時陳俊卿與允文爲左右相高選
諸王邸講讀官丙直講慶王府與芮煜李彥穎劉焯並命士論榮
之未幾復提點廣東刑獄移廣西路歸正官沙世堅素武勇坐賊
決配靜江部有劇賊未獲丙諭世堅立功贖過世堅馘渠魁以獻

丙奏復其官其後世堅遂平李接破蒙光漸世以丙爲知人善任
也徙福建路轉運副使淳熙中擢秘書少監駕幸秘書省面賜金
紫服明日進秘書監未逾旬兼擢中書舍人六年輪對奏請置四
川襄漢江淮三大帥擇曾任二府有文武威望者各當一面復列
上五弊一曰取士之弊代筆傳義公行富人以賄得科第二曰養
兵之弊冒名寄籍闕額不補懦弱不汰一有草竊輒動御前之軍
三曰理財之弊以橫歛豫借重折苛政爲能四曰刑獄之弊故縱
大辟淹留奏案五曰薦舉之弊非權要請託則謬舉親舊孝宗覽
奏嘉納榜選德殿御屏之上眞拜中書舍人七年除吏部侍郎仍
兼外制八年轉中大夫兼給事中丙感知遇益亶亶論事巨室裴

良顯訴其兄良珣死有冤狀事下臨安府良珣東宮春坊林龜年壻也語連龜年臨安尹不敢治詔送大理朝士有爲龜年地者令運使先審責良顯不實反坐乃施行丙駁奏語曰願少存國法爲子孫萬世計竟送大理前戶部尙書韓彥古以曾覲援有起廢意丙極口詆之曰是人仰累聖德大臣憾丙激切撫二事指爲賣直欲出之孝宗不聽他日丙入謝孝宗諭曰朕自喜給舍得人數月進權吏部尙書同修國史尋兼侍讀丙取陸贄奏議切時者反覆開陳進司馬光五规范祖禹帝學以資乙覽轉大中大夫正除吏部尙書丙謂所親曰范鎮六十三致仕吾已遲一年矣上章請去十年二月除龍圖閣學士知建寧府移知紹興府兼浙東安撫

使以臧否郡守後時降中大夫孝宗銳意更治手批訪丙欲通差官民戶丙奏通差害多舊時著令里正專掌盜賊煙火比來邑官責以應辦至於破產若以免役錢募耆長供他役則善矣從之臣僚言兩浙東西四路和買不均之弊送戶部給舍等官詳議丙與轉運副使邱宓議立畝頭均科法詔下兩浙施行民以爲便未幾請祠提舉江州太平興國宮皇城邏卒誣丙載官米萬斛而去轉運使遣其屬核實無之孝宗語宰執曰使鄭丙有是則今日無人可信矣秩滿再提舉隆興府玉隆萬壽宮轉通奉大夫起知泉州丙治泉如治越或勸從寬丙曰惟有德者能以寬服民吾固非用猛者然嫉惡有素豈以晚節喪所守哉光宗登極進端明殿學士

丙應詔上封事數千言以謹始為戒紹熙四年致仕明年卒年七十有四贈金紫光祿大夫後贈特進諡簡肅丙和易近人及立朝論事氣節凜然在銓部抑僥倖懲奸欺無敢干以私者生平留意人材所薦蕭燧胡晉臣羅點後俱至二府餘如李燾之博洽劉國瑞之清正唐仲友之學問林栗林枏鄭湜之剛方丙皆援引不少置惟與朱熹不合嘗奏近世士大夫有所謂道學者欺世盜名不宜信用意實指熹而言蓋丙雅厚仲友而仲友知台州為熹所劾故也宋史丙本傳云監察御史陳賈奏道學之徒假名以濟其偽乞擯斥勿用道學之目丙倡賈和其後為慶元學禁善類被厄丙罪為多案丙立朝事跡偉然可傳熹作石整墓志云詔舉材堪刺舉者吏部尚書鄭丙以君對又作張右司墓志云刑獄使者鄭公丙閱其決事故牘歎曰此判不可移端如南山矣其為名流所推服如此據此熹固推丙為名流而整墓志作於淳祐九年十

長樂縣志 卷二十三 列傳三 八 名臣

二月在丙劾熹之後尤為不沒人善之公子頤孫奉議郎通判辰宋史乃以門戶之見盡沒其實非公論也州齡孫承奉郎監潭州南嶽廟道光通志

何萬字一之登隆興元年進士淳熙三年遷著作左郎會參政龔茂良欲覈戶部歲撥總領司浮額知萬守正不阿奏遣之萬劾淮東總領錢良臣侵盜大軍錢糧累數十萬茂良上其事語在茂良傳明年遷著作郎未兩月茂良被謫萬竟坐茂良黨罷歸十二年起為右司郎中上言本朝自淳化後已號極治仁宗深慮風俗易奢景祐初詔天下士庶之家非品官毋得起門屋非宮室守觀毋得綵繪器用毋用純金及表裏用朱非三品以上及宗室戚里家毋得用金稜及玳瑁器非命婦毋得金為首飾及眞珠裝綴凡有牀

褥之類毋得用純錦繡民間毋得乘檐子其用兜子者昇無過四人非五品以上毋得乘鬧裝銀鞍違者物主工匠以違制論請令禮部開具名件嚴立禁戢始自中都以至四方則用度有制民力自寬詔如所議施行未幾出知漳州嘗請湔滌高登罪籍追復原官有司格弗下

道光通志

陳伯震府志作伯霖字震之襄八世孫由侯官徙居長樂紹興進士秦州知州累官廣東經畧使龍圖閣學士嘉定中奉命使金以數言折服強敵人稱其不辱君命

乾隆賀志

鄭性之字信之初名自誠號毅齋後避理宗潛邸舊名遂以字行初受學於建陽朱子朱子詢其字歎曰好大名大字性之由是自勵

長樂縣志

卷二十三 列傳三

九

名臣

朱子奇之登嘉定元年進士第一人

宋史本傳作嘉定四年誤

授承事郎歷簽

書奉國軍節度判官郡守王介以性之掄魁不責以吏事性之曰吾豈敢以幕府爲蘧廬乎益盡瘁奉公六年三月召對以崇聖學教太子爲先次論人君所以立國者在人才人才所以能立人之國在氣節三論楮幣邊事軍政除秘書省正字八年正月遷秘書郎轉對首言去歲遣使通國譁然以爲非便朝廷以軍政未脩一日絕幣兵連禍結甚於行李玉帛之費然國人之論未嘗欲朝廷用兵但願陛下勿忘國讐耳完顏氏救亡不暇豈復敢與我敵此天啓我自治之時奈何一切排抑遂使議者疑朝廷特借生事之戒以蓋其畏怯之心臣嘗論今日之憂不在於亡金而在於蒙古

與中原崛起之羣盜臣謂當擇二三大帥邊陲之事悉以付之規模一定行之必能成功且邊守數易不可者三而送迎之費不與焉淮甸攻守之具非三五年經理不能就一不可也縱能就而代非其人則棄其前功二不可也其人既不爲久計數日待遷諉其責於後人三不可也邊郡不過數十城以天下之大豈無數十輩忘身殉國自奮功名之士誠能精選而久任之將見祐預琨逃之流接踵而出矣九年兼權尙右郎官乞補外官知袁州十一年召入奏事性之言國有政事謀之大臣參之執政既相與可否矣苟有未至則侍臣得以獻替臺諫得以論列理之所在何嫌異同今侍從臺諫間有忠憤不能自己者立中傷之此非國家之福十二

年召除侍左郎官轉對言淮東忠義雖曰區處得宜然主客之勢不宜偏重淮西關隘經理頗見次第然奏請率多捍格請假以事權生其智勇自蜀得重帥朝廷信任不疑仰見陛下將將之道然聞其每有申請一切順從昔郭子儀擬除州縣官一人不報或謂宰臣不知事體子儀曰自兵興以來姑息武將求得欲從今某除吏不行是朝廷不以武臣見待也豈非今日待蜀帥之法乎復言祖宗用法寬厚惟於賊吏獨嚴近者貪風復煽苞苴公行昔威王烹阿封墨而齊國大治楊綰當朝減聲樂省騶從撤第舍者有之轉移在君相爾十三年兼國史院編脩官俄除將作監時東宮虛位中外皇皇性之乞早定大計且以立長爲言寧宗嘉納十六年

除右文殿脩撰知贛州贛卒以姑息煽亂提刑縱勿捕性之曰贛守以兵鈐繫銜討賊吾職也豈敢以其責諉監司設方畧討平之理宗卽位除集英殿脩撰知隆興府寶慶三年遷寶章閣待制陞江西安撫使仍舊任以勞得暈疾丐祠紹定六年進敷文閣待制起知建寧府端平元年拜吏部侍郎入對言陛下大開言路以通壅蔽然言者多則易於取厭言之激則難於樂受若少有厭倦動於詞色則讒諂乘閒或不自知矣時荆襄圖上八陵性之奏朝陵之使不可已中原之機不可失然自開禧用兵誤國嘉定僅僅自守既不能制亡金垂絕之命何以遏強寇方張之勢臣謂急宜守衛三邊爲綢繆牖戶之計綏懷遺黎示中原經畧之漸擢左諫議

大夫兼侍讀上殿言近觀趙范趙葵及全子才奏疏書牘議論蠶生氣吞強敵臣退而深思終不得其說今范改圖易謀不膠舊議而葵氣愈銳其謀亦愈決昔句踐生聚教訓十年而後平吳諸葛亮閉關絕棧二十一年而後出師葵帥淮東甫及數月而欲建恢復之功古人何難葵何易耶復言范鎮謂備契丹當寬河東北之民備靈夏當寬關陝之民臣亦謂今日欲經理中原當寬江淮之民彼之困於糴買困於工役困於夫運者沿邊郡縣官吏誅求殆盡矣願陛下下霈然之詔以先臣鎮之論風厲沿邊帥守稍寬科條爲國家愛惜根本天下幸甚是夏六月除端明殿學士二年同知樞密院事三年拜參知政事明堂禮成以雷雨作待罪左右相

鄭清之喬行簡竝册免御筆勉留性之命兼同知樞密院事力辭不允淮東總領吳淵詣闕奏事為監察御史唐璘所論理宗欲留淵性之密言以為不可璘反疑性之庇之遂劾性之寬而無制懦而多私璘素出性之門下自改秩入臺皆為所擢疏入朝論大駭性之從容奏曰璘本孤直所言深中臣病終不復辯後璘補外與人語及性之輒曰鄭公雅量吾未嘗不自悔輕發也嘉熙元年除資政殿大學士知紹興府浙東安撫使辭不拜提舉臨安府洞霄宮久之加觀文殿學士致仕寶祐三年卒年八十有四贈少傅諡文定性之所至為民去害就利務崇化厚俗立朝秉正無所附麗李宗勉每見性之論事必曰生平但以公為寬和長厚人今親見

乃如此深切也與人交終始無間莆田陳均客性之門凡三十年著書多資其力于德起嘉定十六年進士歷太常寺郊社令知興化軍乞祠便養終朝散大夫管華州雲臺觀卒

按一統志作閩清人通志作候官人

及攷十都龍泉山雲梯石上勒雲梯二大字稱里人鄭性之書其墳塋在八都阮山實係邑之十都人一統志殊誤通志蓋就其所

遷而書之耳 乾隆賀志參道光通志

張翀字蜚卿官左司郎中以文學廉能稱

乾隆賀志

趙以夫字用甫號虛齋

通志作歷齋

居邑東芝巖助國公德鈞八世孫也

父彥括乾道五年進士官終尚書郎以夫少孤苦學用父蔭授紹興府諸暨縣尉嘉定十年正奏調江陵府監利縣令邑通淮廣姦民多盜販鬮馬以資敵以夫設方畧掩擒獲馬百匹獻於府薦知

建軍南豐縣丐歸主管西外睦宗院紹定二年盜起汀邵安撫使王居安檄兼參議會詔起陳韓知南劍州繼爲福建招捕使韓奏委以夫通判州事兼主管招捕司機宜文字知邵武軍尋乞祠主管武夷山冲佑觀六年冬起知漳州除提舉江南西路常平茶鹽公事楮法初變廷議民間市賤楮輸納爲虧官令別納補虧錢以夫抗疏曰昔輸一千今增五百是令不信也輸於民者有補納出於官者無貼支是名不正也理宗大悟可其奏以夫復著原弊救弊二論上之其後出十八界收十六界卒如以夫策除左曹郎官兼權樞密院檢詳諸房文字入對條備邊十策遷左司郎中兼提領安邊所京城火求直言以夫極論致火之由乞改葬故王以弭

天譴俄以太府少卿兼左司改直煥章閣樞密副都承旨力言光州危急宜合淮東京湖二閩兵速援之衆未以爲然果失守嘉熙元年十一月歷官預言季冬日食將旣以夫上言臣嘗考春秋與歷代志紀日食爲咎大要在脩德政以弭之夫日食猶古所有之異也然日與金木水火四星俱躔於斗食將旣則四星俱見日中見斗此則古所無之異也斗分屬吳禍福有歸望陛下亟側身脩行則太陽當爲之不虧宗社事重可不念哉二年陞右文殿修撰樞密都承旨值鄞卒作亂除沿海制置副使兼知慶元府先是制臣陳曠去後鄉宦趙善湘攝閩事散帑庫市恩卒愈驕大譟善湘懼遁入山中以夫單車入城具禮招善湘還是時倉庾匱乏以夫

令糴白米散軍糧而自食其殘腐者監軍趙濤夫挾善湘勢擅斬禁卒衆怒將爲變以夫素得諸校心夜以謀告以夫械其人付鄞令趙時詰訊之盡得姓名令緩漏籌密召水軍入城掩捕皆獲之梟首三十餘人它置勿問比曉善湘等始覺咸大歎服淳祐元年召權刑部侍郎俄落權除正職以夫每對必言國本錄嘉祐紹興建儲始末以進復薦趙汝騰劉克莊湯巾黃自然鄭逢辰楊棟宋慈包恢許致祥姚希得理宗嘉納除寶章閣待制沿江制置使江東安撫使兼知建康府行宮留守和州無爲軍安慶府屯田使以夫至鎮以御賜金帛頒將士築寨造船繕甲爲戰守計蒙古兵圍和州以夫檄諸郡往援夜潛師劫寨蒙古兵敗走以夫料敵必報

忿預增無爲戍伏舟師於楊林蒙古兵果至諸將夾攻大敗之復遣偏師援儀真躬督水軍巡江至采石裕溪而還事聞御札褒獎召權刑部尙書引對緝熙殿時大旱江湖俱涸以夫言湯以六事自責陛下自省此六事有耶無耶名曰去姦而納邇言進奇玩名曰崇儉而建龍翔祠感生苞苴宮室自若也讒夫女謁如故也忠直次第引去嬖倖出入交通天怒民困職此之由理宗悚然俄兼侍讀修玉牒有旨令以所著易通進講改禮部尙書遷吏部尙書兼侍講玉牒史職復歷陳政宣閒弊事由大臣有奉承無匡救所致丞相鄭清之愬於理宗曰侍從以臣方京黼臣當避位理宗不得已除以夫端明殿學士改知西外宗正事實祐四年以疾告老

進光祿大夫資政殿學士致仕卒年六十有八贈開府儀同三司以夫素好士士常滿門晚稍稍引去惟同郡曾震受死生之託記以夫言行纖悉不遺莆人鄭與言受以夫易學爲以夫服緦誄甚哀後策名歸猶迂道哭其墓談者以曾比任安鄭方侯芭云

乾隆賀志

參道光通志

潘枋字廷堅初名公筠避理宗嫌名改今名祖子儀邵武軍戶曹父鈞伯榮州助教枋幼有雋才讀書五行童下六歲以能詩聞端平二年策進士問所以凝天命固人心者枋對曰陛下承休上帝歸德匹夫何異爲人子孫身荷父母劬勞之賜乃指豪奴悍婢爲恩私之地欲父母無怒不可得也復言陛下手足之愛生榮死哀反

長樂縣志

卷二十三

列傳三

十五

名臣

不得視士庶人此如一門之內骨肉之間未能親睦是以僮僕疾視鄰里生侮宜厚東海之恩裂淮南之士以致人和時對者數百人庭堅語最直擢第三人嘉熙元年五月行都大火上書者咸訴濟王寃狀殿中侍御史蔣峴遂劾起居舍人方大琮正字王邁編修劉克莊鼓煽異論併斥枋前對策語涉不順請皆論以漢法理宗置枋不問旣而改宣教郎除太學正出通判潭州會日食求言枋應詔上封事畧言曰熙寧初元日食詔郡縣掩骼著爲令故王一坏淺土其爲暴骸亦大矣臣嘗悲夫流俗之論辛卯丁酉之火皆謂故王爲之此何異左氏之誣申生也夫以無所逃而待烹之申生而忍以晉界秦哉故王得罪於權臣有之矣於陛下無間言

也必不效尤伯有以憂陛下請以王禮改葬又移書丞相游似曰天下事當論是非不當論難易枋旣以身許吾君不敢愛其死而變其說公以爲非耶不敢以爲公累以爲是耶願君毋病其難似心善其言方將收用而枋卒年四十三齊東野語云潘枋爲福建帥司機宜文字日醉騎黃犢歌離騷於市嘗約同社友釀飲於南雪亭梅花下衣皆白既而盡去寬衣脫帽呼嘯酒酣客散則衣間各濃墨大書一詩於上矣衆皆不能堪居無何復置酒瀑泉下行令曰有能以瀑泉灌頂而吟不絕口者衆拜之庭堅被酒豪甚脫巾鬢髻裸立流泉之衝高唱濯纓章衆謬爲驚嘆羅拜以爲不可及且舉詩禪問答以困之潘氣略不懾應對如流然寒氣深入經絡間矣歸即臥病而殂案宋史本傳不言枋爲福建帥司機宜文字其入閩幕不知何時約當在除太學正之前齊東野語所載瀑泉灌頂事有無不可攷然其卒則在潭州而不枋跌宕不羈爲文未嘗起草脫筆墨蹊徑而在福建也墓誌可證

尤長於樂府初赴省試時峴得其卷出夸劉克莊曰吾爲國取一

長樂縣志

卷二十三

列傳三

十六

名臣

佳士君可酌酒賀問其姓名則潘枋也後峴擢臺端希旨論枋枋

遂流落補外峴晚年殊自悔之著有詩集古樂府祀郡鄉賢祠乾隆

賀志參道光通志

陳春官監察御史右正言以端直嚴重稱於時乾隆賀志

明

陳良字從時洪武中以明經薦授吏部主事永樂初營建北京與同官蕭儀切諫忤旨下詔獄儀死良謫交趾尋復官遣閱遼東兵陳軍中弊政四事爲當事者所忌出爲嚴州通判舟行有巨蛇隨之良曰是必有婦人冤者到官訊囚得婦人冤狀立釋之人以爲神

乾隆賀志參道光通志

陳仲完名完以字行江田人洪武甲子舉人授延平府訓導永樂初用修撰王袞薦徵爲翰林院編修二年詔簡東宮官擢左春坊贊善奉命脩永樂大典仲完與物無競而論事無所回撓嘗有詔汰在京冗官時鄒濟長春坊畏縮稱疾次當仲完卽奮筆書某當留某當汰衆服其明決被汰者亦媿服侍仁宗於東宮嘗問其所長對曰臣無所長但職任所爲者未敢苟有退避仁宗甚重之奉命授皇孫經啓迪尤多歷官二十年不遷怡然自得及仁宗卽位仲完前一年卒矣楊士奇爲傳惜之有簡齋迂稿祀鄉賢祠

乾隆賀志參道

光通志

吳實字仲美龍門人本姓林慎思裔孫也永樂辛卯進士授御史立

長樂縣志

卷二十三 列傳三

十七

名臣

朝敢言不避權貴時稱爲吳鐵面處州民因坑冶挾讐蔓獄實奉命往按微服廉訪出辜者百五十人奉天殿災應詔陳六事曰惜民力節財用重爵賞慎刑罰擇賢才嚴考課皆切時弊遷廣西按察僉事致仕卒年九十三著有樸齋集

乾隆賀志參道光通志

馬鐸字彥聲一字梅巖嶺前人幼異常兒稍長受禮記於鄭宣爲文援筆輒就永樂壬辰賜進士第一授翰林脩撰成祖兩幸北京皆留侍監國屢顧侍臣楊士奇曰馬鐸可謂質實無僞者矣春秋釋奠先師朝制用翰林國子官四人分獻翰林獻位在左後有易之者及鐸行事卒辨而復之卒於官鐸爲人耿介伉直臨事侃侃無所顧避自奉儉薄遇人危急必濟之有一弟篤愛之弟死旣葬鐸

顧其子听曰他日葬我必於此吾兄弟生死不違也其居據山林之勝名曰梅巖遂以為號其卒也士奇誄之又志其墓祀鄉賢

乾隆賀志參道光通志按傳內鄭宣通志作王宣

李騏字德良沙京人父長孫傳見鄉行騏永樂丁酉鄉試第一戊戌舉會試及廷試復第一初名馬臚唱日帝親書其字於旁遂名騏授翰林脩撰賜銀帶朝服中外以為榮騏事父母極孝奉繼母尤謹遭疾方愈值成祖晏駕即出哭臨或勸其慎疾則曰吾受厚恩不能他有所裨益如不獲一哭於几筵以罄臣子之情抱恨無及明年繼母訃至扶疾奔喪抵家越月卒大學士楊文敏深器之惜其不永年為志其墓祀於鄉

乾隆賀志參道光通志

長樂縣志

卷二十三 列傳三

十八

名臣

陳灝字季周

府志作繼周

縣西人永樂丁酉舉人初訓導松陽改封川擢

交趾道監察御史疏劾中官奸貪置於法以僉事督學山西轉陝西按察使致仕初灝為教官時同郡嚴烜薦之及灝為御史克舉其職世以烜為知人

弘治劉志

黃文正字子正古槐人永樂甲辰進士選南京監察御史剛果有為嘗巡按鳳陽辨平民黃毛頭等三十六人冤後遷廣西按察司僉事守雁門關號令嚴明軍士畏服代州一方恃以為安年雖老而氣節不渝戚畹側目而羌夷畏威為一時賢執法云

乾隆賀志

李森字叔嚴沙京人正統七年進士授南京刑部主事決囚平允有指揮使王某庶子賂當路廷臣及太監王振謀奪嫡事下森力持

不可庶夜賂以金三百森暴諸朝侍郎齊某恣權陰娶繡女得其狀具奏以聞英宗北狩貽書尙書王直給事中程信曰太子幼冲未能踐祚郕王年長宜定大計以安人心王程言於朝從之英宗還京千戶龔遂榮寓書學士高穀言奉迎禮當從厚主上當避位懇辭而後受都御史王文內閣陳循惡之奏遂榮非分妄言下獄森以書諫曰彼武夫尙知此禮况吾輩乎何可以非分妄言箝人之口不聽景泰三年廢皇太子爲沂王立皇子見濟爲太子森聞草疏馳傳欲以死爭且極詆陳循高穀等詹事府丞李侃見之大驚使人疾還其奏森嘆曰南城之錮已昧子臧之節易儲之舉益肆殄臂之謀吾不復處朝廷上矣遂恚憤成疾卒於官同舍郎爲

具棺衾理後事成化二年森子明經持公狀謁韓軍門雍雍曰嗟乎此雍故同年士李森也雍親見其行事豈不然哉於是論次其事掇其大畧如此

同治彭志

鄭序字志禮福湖人正統壬戌進士授刑部主事歷兵部郎中湖廣左參議時列郡歲祲荆襄盜起督賦嚴急序寬簡如平時曰甯我得罪不忍吾民顛沛也巡撫言序非理劇才牒吏部更任序遂乞休居家三十餘年年九十卒

乾隆賀志參道光通志

謝士元字仲仁一字約菴江田人景泰甲戌進士授戶部主事督通州倉陳四弊爲尙書年富所契監倉中官不利其爲欲中傷之繫羣胥吏使織其罪竟無所得天順七年擢建昌知府始視事訟者

懷牒滿郡庭士元立發數奸其一方出券士元叱曰僞也券今式而所訟乃二十年事民驚服訟爲衰止郡軍將多庇盜士元以他事持軍將皆股栗姦無所伏郭內外十里至不拾遺乃大興教化勸勵風俗新學宮聚書萬卷儲禮樂器擴射圃暇日則臨視督課按射禮習行之作敦化表忠勸學圖詩梓布村市有兄弟訟田者取圖詩曉譬遂感泣相讓歲再饑再發粟旣盡則捐俸爲倡富民爭開廩延糴大理寺卿夏時正方巡江西上其治狀獲旌秩滿民乞留進從三品俸治府事如故以憂去服闋起知廣信府永豐有已閉銀壙處州盜聚數千人強發之士元勒兵趨勦賊陽遁留二人爲餌邏者見而射之士元亟止不及伏四起士元傷左股血

流洞韡裹創力戰獲其魁塞礦穴而還擢四川左參政分守川東夔州東鄉多劫盜士元立城戍擒捕數百建始人豪奪相仇殺訴牒無虛月士元徑往縛數魁士人大戒進右布政使宏治元年就擢右副都御史巡撫其地土官大小娃者將煽亂士元託行邊馳詣其地賊恐獻羊豕道左士元徐慰遣之歲大祲流民趨就食士元爲廣室十餘區糜之藥病葬死歸給符籙全活者數萬明年坐事下獄事白遂致仕士元天性孝友以餘俸市田宅與兄弟共之一門同爨食指數百兄弟子女婚嫁費皆出己門庭肅讎士大夫尙其家法子廷柱字邦用宏治己未進士授大理評事鞠獄精明厯官湖廣按察司僉事平反有聲隔境之民皆越質成卒年九十

六廷柱爲人謙恭樸素善屬文有典則詩亦莊重能繼其家聲孫寬字嚴夫一字鳳崖爲人簡樸力學謹密無浮慕正德丙子領鄉薦授浙江泰順令寬和保民政聲大著調象山未幾丁內艱起補鄞縣爲政一如泰順後數年掛冠歸有司罕見其面屢舉郡邑大賓壽至九十有五優游松菊者四十餘年著有約菴稿及詠古詩四卷卒賜祭葬祀於鄉

乾隆賀志參道光通志

陳維裕字饒初江田人天順庚辰進士官監察御史屢糾大臣風裁凜然時曹吉祥石亨恃復辟功橫行不法惟裕抗疏劾之幾爲所危其文行尤著尋丁內艱卒以孝稱

乾隆賀志參雍正通志

陳景隆字如初一字畏菴江田人成化乙未進士令武康改德清中

長樂縣志

卷二十三

列傳三

二十一

名臣

官奉使倚勢橫索景隆正色拒之曰吾官可去剝民媚人吾不爲也擢監察御史彈劾無所避人目爲眞御史奉勅江西清戎及磨刷山東等處卷牘政肅民懷尋陞山東僉事制歸卒生平奉職以誠處家以義閭里稱爲寬洪長者其廉潔之操始終不貳

弘治劉志參雍

正通志

林廷選字舜舉竹田人先世贅於樊從其姓成化辛丑進士授蘇州府推官每於死獄求生屬縣有鄧珙者累年訐訟株連百數人勘官數輩不能決王恕爲巡撫命廷選訊鞠得情列狀上報恕訝其速親覆於庭無不欵服大加獎歎常熟桑懌作賦紀之宏治五年擢御史明年上疏得復姓巡按廣西屬夷寇犯平樂府討平之劾

罷不職武臣及貪墨郡守數人還朝考最九年遷浙江僉事轉副使十八年遷廣東按察使廣俗健訟前官多阿比文致其辜廷選平法處之人無寃告者正德四年陞江西右布政明年轉浙江左布政尋遷南京大理寺卿晉都察院右都御史總督兩廣軍務兼理巡撫上思州舊爲土官所治中更流官嘗不靖六年夷目黃錙等聚衆攻州欲奪印廷選發兵捕錙下潯州獄已越獄復叛復捕獲之八年廣西盜李天寶等作亂又討平之廷選督兩廣五年習知地方險易土酋順逆夷獠巢穴遠近故連歲用兵倉卒應變懸合機宜然惓惓以嗜殺爲戒撫而復業者甚多五疏乞休俱溫旨慰留旋擢南京工部尙書復再疏乞休許之家居十餘年杜門自

長樂縣志

卷二十三

列傳三

二十二

名臣

守奉身清約卒贈太子少保

乾隆賀志參道光通志

陳崇德字季廣江田人成化辛丑進士授清江知縣徵南京御史同官楊茂元以直諫忤旨禍且不測崇德抗疏救之擢廣西副使兵備右江道討平柳州慶遠鍾寇遷左參政右江分守道進江西右布政使以劉瑾亂政賄賂旁午引年歸

乾隆賀志參道光通志

鄭錫文字禹範一字艾菴西隅人宏治癸丑進士授義烏知縣縣西

有繡川湖

閩書作秀湖

久而淤淺錫文募民濬治周回築隄脩石閘以

時啓閉積所濬土樹松其上民因名曰鄭公墩徵南御史以忤劉瑾奪官瑾誅起雲南僉事土官治兵相攻單車往諭咸服罪累遷江西右布政歷官三十餘年苦節不渝子源渙字與聚正德丁丑

進士官刑部主事偕邑人林公黼陳談疏諫南巡被廷杖公黼死
源渙亦創甚猶匍匐爲治喪士論避之官終建昌知府父子均祀
於鄉

乾隆賀志參
道光通志

陳文試字道衡十三都人大父兪字彥景宣德元年舉人任無錫知
縣文試以宏治丙辰進士授臨川令首除豪猾政聲大著擢監察
御史時孝宗勵精爲治樂聞讜言文試上陳敬天脩學十二事多
見采行他所舉劾咸允時論

乾隆賀志

林公黼字質夫一字石峰仙山人父節成化七年舉人岐府伴讀公
黼少力學精通博貫喪父母三年蔬粥不入內第正德丁丑進士
授大理評事詳刑謹細不以一字苟喜怒十四年三月帝將南巡

長樂縣志

卷二十二 列傳三

二十三

名臣

中外危疑廷臣交章諫帝怒責先諫者跪外庭待五日罪止來者
無敢諫諸奸又日以危言恫喝聞者皆惴惴公黼夜草疏聞暗中
泣歎聲不顧疏上帝怒加甚命鎖項械手足暴日中五日復繫詔
獄待後命黃鞏與語嘆曰吾取友徧矣乃近遺質夫越四日杖於
獄又越五日杖闕下醫無完膚流血漬街砌昇出與行人李紹賢
同時死年四十四殯於同年刑部郎鄭源渙舍源渙亦被杖力疾
爲治喪事京師人無不哀者世宗立贈太常丞賜祭錄子逢春入
太學福王時追諡忠恪逢春授光祿署丞歷九江通判陞署正終
榮府長史所至稱廉能以養母告歸

乾隆賀志參
道光通志

陳毓賢字則英一字橫川江田人正德丁丑進士歷工部郎中嘉靖

三年命濬漕渠毓賢疏請於寶應高郵湖隄建閘十座以殺水勢略言寶應汜光湖往來糧船入湖三十餘里湖隄舊基俱土石築成高湖面不過三尺許隄西湖勢高隄東田勢下惟賴一隄障水而已且西有天長六合泗洲諸處地多高陡一遇積雨卽時瀰漫加以黃河水漲又由淮口橫奔不時衝決非惟漕運有妨而寶應鹽城興化通泰諸州縣民田滄沒饑荒隨至此江北第一患惟於高郵隄迤東脩築越河庶可免風波之患擢陝西布政司左參議分守關西道增築平涼夾城歲饑請留京折多方賑貸轉山西按察司副使兵備冀北道流民嘯聚山谷爲寇鄉導毓賢招撫之悉解散代王左右欲於冀北鑿河溉莊田毓賢不可賂以金正色拒

之遷廣西左參政適右江獍狴結思田土兵倡亂諸道會勦屢償

毓賢懷以恩信寇卒平督撫方薦之未上卒

乾隆賀志參道光通志

鄭憲字有度號磁江仙崎人兄慶字有章嘉靖八年進士歷官滁州

知州工部員外郎郎中廣東參議憲性穎悟端和純粹有黃叔度

風正德丁丑進士授刑部主事爲大司寇劉玉

雍正通志作玉藻

所知令

看詳諸司奏牘丁內外艱不入私室者六年服闋在告積十四年猶以主事謁選其秉禮恬退類如此先與禮部主事方獻夫相友善及憲起復方以議禮驟致通顯秉銓衡矣相隨邸舍一揖而出不與叙欵方銜之遂移覈稽違待報逾年仍補刑部蓋憲抗節履道雖偃蹇濡滯弗恤也終光祿寺丞卒祀鄉賢

乾隆賀志

陳文沛字維德六都人先姓林正德丁丑進士授工部主事歷郎中
正德末有建議脩蘇松水利者進李充嗣工部尚書兼領之未幾
世宗嗣位遣文沛及顏如璋佐充嗣開白茅港起常熟縣東倉至
雙廟一萬七千三百九十二丈又於白茅上流濬尚湖昆承陽縣
各湖爲港爲涇爲漚者凡十有九文沛日暴露風日中故役夫用
命又疏吳淞江六閱月而訖工海溢圯海鹽塘命文沛督脩築天
闕諸塘舊制石多縱少橫文沛使縱橫交錯南抵宋莊通新舊隄
一千三百丈勞勩數月未嘗受有司餽餉又督邊儲皆有功詔增
俸出知撫州府調蘇州所至治最擢山東按察司副使遷陝西行
太僕卿文沛剛介有執楊一清胡世寧李承勛皆薦其可用吏部

長樂縣志

卷二十二 列傳三

二十五

名臣

尚書汪鏐以私憾擠之遂罷家居二十餘年子時範字敷疇嘉靖
辛丑進士清約端慎有父風授戶部主事遷刑部郎中出知夔州
府蜀人以三殿採木大困爲之蠲豁存活數千家遷雲南按察使
歷左右布政使藩帑積羨金五千以充大比費餘貯藏中一無所

取父子同祀於鄉

乾隆賀志參
道光通志

陳談字允默一字鶴峰德隆三子

德隆見循
良陳讓傳

正德戊辰進士官刑部

郎中奉命慮囚權貴人以私請且脅之談曰國憲可斃耶請者惡
詘己卯武宗將南巡談偕同官苦諫被杖濱死出爲兗州知府至
則振窮懲讒以病乞歸道卒祀忠義祠子豪字志興一字肖鶴嘉
靖壬辰進士授新昌

新昌有三
未知何屬

知縣以卓異召拜御史諫復河套

亦被杖出備兵外藩以病歲祲爲餽粥濟民所著詩文爲時所誦

乾隆賀志參
道光通志

陳省字孔震一字幼溪十二都古槐人父大濩傳見循良省才高負重名嘉靖己未連舉進士授金華推官讞獄多所平反東陽飢民掠富人穀幾爲亂省攝邑事安輯之義烏礦盜猖獗省檄諭而解秩滿當徵時嚴嵩爲政諸徵者以賄入或微諷之省曰吾廉吏可
以賄得官耶嵩敗諸徵者皆報罷省乃得御史奉命按山海關疏請罷管糧通判以部郎督餉責督撫大臣校閱邊卒多寡強弱以程將領功罪皆見施行又劾盜餉者置之法督臣不能庇邊政大飭役竣再奉命按湖廣世宗起承天不忘舊封嘗奉太后梓宮葬

長樂縣志

卷二十三

列傳三

二十六

名臣

顯陵騷然繁費會承天水溢睿陵垣傾遂決意南巡命工部張守直太監袁亨等往督工而手白畫宮殿諸圖計費且億萬緹騎偵督相屬於道是時帝春秋高儲宮未定中外皇皇首輔徐階諷諍百端莫能得日夜祈死而已省疏適至言楚水爲患下民死亡流離困苦萬狀不宜更困以大役又伊洛之墟洪水衡注陵谷變遷道路阻梗齊魯吳會曠徒白蓮教隨在竊發洞庭蘄黃鄖漳間盜賊布散辰沅苗夷猺獠耽耽伺隙若乘輿一發禍叢叢生邊患乘之將何以支帝覽之心動謂御史言是遂罷階歎曰是所謂一言回天也先是守直欲盡撤承天殿宇省爭之力守直忿然曰上若詰違命所由吾不能庇省曰某自甘斧鑕決不累公至是守直感

泣曰微公吾得罪天下萬世矣其年世宗崩穆宗卽位省劾尙書霍冀與梓人徐某以興作阿先帝意糜天下財力當治詔罷冀籍沒徐承天守備太監張方多占民田爲皇莊省劾奏之以莊田歸有司省橫斂十三萬金又劾大和山守備太監呂祥七罪詔徵祥還并罷守備官初遼王憲爚以奉道爲世宗所寵賜號清微忠教真人予金印至是省劾憲爚諸不法事詔奪真人印荆世子常冷所爲多不法楚人苦之省暴其罪與憲爚並幽高牆報命復出按廣西劾巨璫王本尋引疾歸起督京畿學政擢大理少卿晉僉都御史提督操江盜效我兵樓櫓旗幟往來江上不能辨省令兵爲幟六按時更易自相識別大集舟師捕盜無得脫者涇縣巨俠董

代以符讖妖術惑衆勢甚張省馳一騎縛之餘黨皆散召入協理院事帝問輔臣往聞毛伯溫賢信否張居正對曰今有省可匹伯溫因述按楚事他日帝罷朝問左右適有臺臣奏事容儀甚都豈卽陳省耶庶吉士宋儒傾險士也欲傾同年生熊敦樸乃自爲疏劾居正持示吏部侍郎王篆曰此敦樸所爲篆以語居正居正大怒省爲敦樸稱枉遂自請外任以右副都御史巡撫陝西仍調操江未上爲篆所劾聽勘萬歷九年再起巡撫湖廣諸宦官道楚者多以謁陵爲名走江陵起居正父省疏禁之又請甦京運蠲積逋省協濟清庫藏併驛傳恤災傷懲積猾裁文武冗員凡二十餘疏皆楚中大利病也五開衛鄰貴州戍卒與苗蠻雜處彼此相煽

惑大豪胡國瑞假鄉約脅衆逐守備火其居誘苗夷與共反省討平之進兵部右侍郎兼右僉都御史及居正歿言者以省爲居正所用又巡撫其鄉遂糾省罷歸道武夷接筇峰遂築室其間名曰雲窩日與諸生講學論文翛然自樂後家值大水延建民溺死數萬浮尸蔽江下省方舟數十艘收而埋之學宮水反射形家謂宜導水爲九曲而其地皆腴田省慨捐之又立義田以贍族人婚嫁喪葬皆有助親舊以貧乏告者一無所拒子所立初名長濬萬曆丙子舉人歷淮安同知擢永平知府雅尙經術集諸生較文藝終日不倦淝漆水漲障城築甃隄栽蓮芰以資民利官終副使夏允彝論云肅宗初幸楚所至供御爲竭且行殿災幾不測晚年將再駕舉朝惶懼無敢爭公疏陰諷上文貞推明之具揭以進上乙其揭中

長樂縣志

卷二十三

列傳三

二十八

名臣

語曰狡逆之徒倘或竊發此非尋常事乃特輟行嗟乎自燕至楚不至釋騷者孰非蒙公之澤而不久升遐得免蒼梧之恨功又何如也一疏回天已足不朽安得以見知權相苛此偉人乎 乾隆賀志參道光通志

鄭世威字中孚陽夏人嘉靖己丑進士適臺省乏員選諸新進士中衆趨赴世威曰纔脫章句躡司耳目毋論躁且虞曠也竟不往授戶部主事監通州倉一日忽心動疏乞南徙以便養未得旨而丁父憂服闋補刑部遷員外郎恤刑陝西出死囚九十六人時已擢廣西僉事當事得陝爰書喜其持平改注廣東遷江西大學士夏言家居撫按及藩臬詣第脩謁率由掖門進世威呼閤者語之曰相國誠尊然奈何使邦大夫蹢蹢旁趨還吾刺去耳閤者錯愕闕中門乃入巡撫汪元錫偕言詣上清宮以祝釐爲名諸官皆從世

威視祝辭相國祈子耳語其僚曰吾儕非相國私暱胡爲乎來拂衣出比焚錄強世威署名不應言恚未幾轉浙江布政司參議適言還朝道杭州遽人來告臺院諸司已駕出城世威以職務辭言愈憾令巡按御史楊九華論罷之九華廉世威無他疵置勿論言復令掌銓者中以大計徐階爲吏部侍郎陰庇之嘉靖二十六年夏倭寇寧台巡鹽御史鄢懋卿壬人也希言指劾世威失律詔巡撫逮問會言敗得已臨海中津橋增鹽額歲以數千計世威議削高籍以所增稅與民台州人尸祝轉江西副使會嚴嵩柄國族黨訕害甚於言副使熊楫嵩戚也抑買廢寺田千畝世威估平直鬻田賑饑民楫持嵩書屬之不聽會入覲絕一切餽遺豐城知縣韓

弼安福知縣黃履新新城知縣陳溫皆以強項忤豪權注下下考世威以次申辨言所枉狀得移中上事竣歸益議餽遺之禁謂罰緩所儲穀備水旱及非常今肺石而徵之筐篚而靡之是奸國法也取盈於公廩而尾閭於權門是奪民救也境內卒有數千里之災一旦欲儲三月糧揀千萬人之命奚可得乎議寢不行江西一署提學兩監試事得賢最盛而譚綸爲著云遷四川參政念嵩父子終螫已致仕歸教授生徒著四書答問詩經答問共十卷林一騏邱問禮陳仕進鄭岳等皆其門人嵩敗中外交薦起南京右通政隆慶元年召爲左僉都御史轉右副都御史遷南京吏部右侍郎改北刑部進舉眞儒崇正學以隆聖治疏內舉薛瑄陳獻章應

從祀論王守仁不應從祀時張居正爲政厲威權以屬禮願使九卿世威歎曰吾方壯時忤貴溪分宜幾陷虎口今老矣安能以僅免之身便辟新貴人前哉遂謝病歸世威通籍數十年朝野參半對大僚臨下吏與農夫處一本於至誠其學一以濂洛爲宗取六籍及先儒語錄其精者獨證於心以侍郎家居環堵蕭然躬課耕作客遇諸田閒曰爲我報主人翁世威諾而入須臾衣冠肅客卽向持刺人也萬曆二年脩縣志卒年八十二贈刑部尙書諡恭介祀於鄉子應曉字昌升通志作昌叔初號退省改號孺環性耿介凡辭受取與必衷諸義親朋不敢干以私爲諸生時學使毀紫陽以陽明學倡士頌其書於曉曉謝不領曰此吾父總憲時所論駁欲罷

其祀者吾豈敢背之相國李廷機每語人曰吾見鄭公如不見麟而見趾也以廢歷太常典簿出爲南寧通判奉檄督鹽運於廣東其法如官市率用母錢三萬八千餘兩牟子錢佐廣西費應曉兌價用原封識不名一錢提舉某曰舊例督運官私市鹽附船償往來費鄭公自裹飯來乎後颶風大作沒鹽運直三千金往按船人及押官等所私市幾二千金猶缺千金應曉爲衆祈免得報可應曉笑曰若如舊例能使衆聽我償乎擢桂林同知以勞瘁得手顛疾致仕歸卒年七十二著有闢佛論主敬說儒竊集識字萬一雲

涵集諸篇

府志論曰曩德清許公孚遠來撫閩孜孜闡止脩宗旨嘗聚士大夫竟日而談余時過里門聽之於心無當也

越數月豐城李公材以滇事戍閩許公復邀諸薦紳謁李公廣止脩之論余愧不敏謝不赴然聞其言宏肆而辯諸薦紳亦虛而往

虛而歸耳蓋當世廟初海內于致良知一說奉為正印其後屬厭別揭止脩之日若超致良知而上之抑何多歧也良知能孟子與對舉並言要以為親親之仁敬長之義達之天下則良能可廢乎若謂致即能為是孟子與顯而言之王文成偏而晦之矣至于止修寧出知能之外曾子明知道而必曰以仁道為達道以立倫極夫子言脩身而必曰以道言脩道而必曰以仁道為達道仁為達德不慮之知不學之能止於焉擇脩于焉先聖賢之言同條共貫可謂至明至盡共察共由者矣今曉曉曰致良知也止脩也奚異于止行潦而概江河竊容光而盡日月哉鄭恭介之闢文成大有功于聖學顧其時拾良知之唾餘者並列崇撫爭欲申其師說恭介之言譬孤鳳鳴于衆梟難與和矣第學者得是說而存之俾正學昭明則彼立戶分曹強而為異者必不攻而自破也○乾隆賀志參道

陳玉字汝良一字龍峰沙京人嘉靖辛丑進士為刑部主事南海龐尚鵬貧賤時聘尚書王吉女既而吉悔婚女矢死不二吉憤致尚鵬罪玉曰殺人以媚人吾不為也力明其冤後尚鵬巡撫福建為

長樂縣志 卷二十三 列傳三 三十一 名臣

王建生祠云玉長於詩時嚴嵩當國亦能詩玉論詩與嵩合嵩欲交歡之適職方郎王尚學忤嵩欲中以大辟玉與同官袁福徵林大章力持之尚學得減戍楊繼盛下獄玉賦幽居歌以傷之尋出為饒州知府多善政罷歸玉恂恂言不出口而文如泉湧不竭其詩冲淡和雅與王世貞李攀龍殊調而世貞作又五子詩玉居其一子江以太學生選光祿寺監事遷高安縣丞以劉基嘗官此作景劉堂矢志清白六年如一日上官屢旌其能署縣事政聲益著以解輸至京疏減虛稅四千緡民德之擢興國州同在太學嘗率同列十七人伏闕疏嵩罪聲譽不愧其父夏允彝論云當七子之垢穢聲宜其不與合也然聞分宜貌殊好士楊忠愍初入都分宜延之款語移時楊幾為動既出行數里乃忽奮鞭自策曰以其溫

語移我鐵腸繼盛非人哉遂疏糾之非忠駭誰不中其甘餌者公既以詩稱與之合而力救職方傷忠愍之幽繫尤與大忤集枯不集苑古人所難也聞公子江曾率大學生十七人伏闕疏分宜罪雖不得請談者率引其舌不收其事不甚著然吳敖兩宗伯常言之當不虛稱是父子矣○
乾隆賀志參道光通志

石磐字民漸古槐人嘉靖丙午舉人知臨淮縣審編里甲流亡復業有吏部子過邑家奴索夫役破儀門磐笞之繫於獄鎮守大監令伏謁磐不聽遣人來呵責磐亦笞之沛以西河決磬力主築白馬隄隄成人呼爲石公隄尸祝焉擢職方主事條邊事甚悉尙書霍冀奇之兩廣倭亂磬爲廣東按察僉事行至肇慶倭陷雙魚所雷廉大震磬躬督將士出戰復雙魚斬首千五百生擒四百人追餘賊於牛牯墩富林鐵場悉平之擢布政司參議督府欲多叙功磬

長樂縣志

卷二十三 列傳三

三十二

名臣

不可忤督府意罷歸著菊徑漫談十四卷卒祀於鄉

乾隆賀志參道光通志

陳聯芳字以成一字青田年十一補諸生嘉靖丙辰進士授金華推官以廉平著聲選監察御史巡按宣大值西北有警檄邊帥飭備敵不得入既而通州告警上防守五事世宗嘉納再按廣東會城與島渚爲鄰先是海賊剽掠總督吳桂芳撲滅之以貨物雲屯城外議建外城民有屋廬被撤者作蜚語版築幾寢聯芳力贊成之工甫畢而海寇曾一本突至向之怨謗者乃德之因與桂芳並祀還朝劾怙權中官王本及錦衣黃錦京師肅然四十一年命偕同官凌儒監順天鄉試議兩京應監生與生員一例彌封不另編號取中之數仍如舊額滿三十五名則止聯芳又言重後塲以羅實

學令兩京同考官閱卷不必書各房名目主考止以文字去取每以考官爲額數分房爲次第禮部議覆允行之隆慶元年請停刑起廢言官諫罷建翔鳳殿皆見采納吏部尙書楊博掌京察吏科給事中胡應嘉劾其挾私庇鄉曲應嘉先嘗劾高拱拱脩恡屬博重罪之言路大譁聯芳及給事中辛自脩力爭乃調應嘉建甯推官張居正生辰百僚趨賀恐後聯芳出游僧寺若弗聞者擢太僕少卿轉光祿卿歷南京太常寺卿致仕卒賜祭葬聯芳廉潔自持奉身儉約布袍敝幘終身若寒士歿後子孫至不能舉火祀於鄉

夏允彞論云當江陵之時才能趨時者俱暴貴卽公之族多以此顯惟公獨見阨公之所以爲公乎○乾隆賀志參道光通志

謝汝韶字其盛江田人嘉靖戊午舉人謁選得錢塘教諭上書臺使

長樂縣志

卷二十三

列傳三

三十三

名臣

請行條鞭法纒纒數千言條鞭法實汝韶倡之擢武義知縣禁侵牟汰浮冗均踐更覈賦役胥吏無能弄文者調知安仁縣時條鞭法始通行海內他令長率持兩端安仁銳意行之奸人李壽刻章印僞書兩御史符從留都馳安仁亭傳騷然汝韶燭其符僞置之法餘千令治亡狀山民數千嘯聚箐峒謀攻郡邑巡撫召汝韶問方畧汝韶偵寇所出入請銳卒分六道襲之賊不及備禽其渠戮之餘黨平遷承天府同知承天濱漢沔多盜汝韶得其黨使爲間謀盜自驚疑悉散守顯陵蔣指揮占沒民田或訟之汝韶縛其奴下之獄張格者當陽大賈也自附張居正近屬時持縣令短長令訴汝韶竟論如法襄水溢民在沮洳中汝韶拯活數萬人呼爲謝

父撫按監司靡不重汝韶事不辦者率以屬之薦爲湖北副使而吏部中讒言乃遷吉府長史吉王得汝韶甚喜居正以喪歸諸藩有致數千金贈者汝韶持不可導王用常禮脩信居正怒嗾監司趙思成齟齬之故事王傳以客禮見監司思成欲抑令如屬吏曰郡國等耳傳奈何不率禮汝韶笑曰王傳之膝可易屈耶遂自免王慰留至涕下汝韶曰臣去國體全所得多矣且母令諸邸言蒲伏監司自吉長史始以遺王羞遂歸兀坐一室凝塵滿席著有碎金集天池存稿子肇淞自有傳

乾隆賀志參道光通志

謝肇淞字在杭萬歷壬辰進士湖州推官改東昌歷南京刑部主事兵部郎中補北工部屯田司值旱疏冗費諸弊數千言畧言不忍

以閭閻有限之膏脂付諸闔豎狙獪之手語甚愷切神宗優旨答之視河張秋作北河紀畧俱載河流源委及歷代治河利病曰吾以盡河之變也福王之國舟千二百有奇肇淞操小艇前驅繕濬多方水道無阻衆以不譁出爲雲南參政遷廣西右布政安氏亂鄰境告警肇淞置官增戍繕備益兵及增鹽引急宗祿抑土司服徭獐鑄錢征商具有實畫常言從來吏治之壞無如今日大抵官不留意政事一切付之胥曹而胥曹之所奉行不過已往之舊牘歷年之成規不敢分毫踰越而上之人旣以是責下下之人亦不得不以故事虛文應之一有不應則上之胥曹又乘隙而繩以法矣以故郡縣之吏宵旦竭蹶惟日不足而吏治卒以不振者職

此之由也又言國家立法太嚴如戶部官不許蘇松江浙人爲之
以其地賦稅多恐飛詭爲姦也然弊孔蠹竇皆由吏胥堂司官遷
轉不常何知之有今戶部十三司吏胥皆紹興人可謂目察秋毫
而不見其睫者矣肇淞好讀書於學無所不窺爲文豐腴軒霽詩
靚深婉麗時罕其倫蚤年卽傳布江左大都率循古法而中有特
造孤詣體無不備變無不盡蓄藻於建安希躅於少陵泛駕於長
慶旣美才情尤深寄興是時詩道向衰以肇淞爲砥柱云夏允彝論曰世
言文人寡實效公起海隅與海內能文家屠緯真李本寧袁實公
諸公相頡頏可謂豪於文矣歷仕殊久行事無可疵也何言文能
累政余以吏故遂闕於文豈政又足累文歟才盈則溢
匱則詘無相累也相資則深○乾隆賀志參道光通志

陳洙字伯訓一字一水江田人祖時憲宏治癸丑進士官湖廣僉事

長樂縣志

卷二十三 列傳三

三十五

名臣

抗璫而死父錠舉人爲南安丞洙生而穎敏年十二籍學嘉靖壬
戌成進士以戶部郎出知襄陽府築隄賑饑活民甚衆時遼王獄
熾同官承風旨爭爲鍛鍊洙默然尋遷雲南按察使副使領提學
道兼權本使黔國公械其民死無算洙呼吏破其械釋八十餘人
巡撫鄒某憤滇多亂置重典者五百人洙察其冤旦夕將決洙夜
叩轅以官力爭乃免尋罷歸久之王錫爵申時行當國特起廣西
參政遷雲南按察使浙江湖廣布政使入爲光祿卿致仕歸僦屋
而居族人同時顯者六七十人車蓋赫奕惟洙最貧曾孫希友傳別

見乾隆賀志參
道光通志

陳應春字汝梅羅田人嘉靖壬戌進士令東陽多惠政擢戶部主事

扈從穆宗謁園陵萬騎如雲應春視芻粟部署立辦迄終事無譁者大司徒馬恭敏深器之榷關潯陽册立規制大駟不得羸縮其手出爲雲南僉事歷廣東西副使參政山東左布政卒應春官粵西有平寇功其在雲南也儒生楊霽訟其室人憑於妖應春檄城隍神驅之三日妖遂絕火其祠滇人御史李元陽爲紀其事乾隆賀志林世章初名慶以字行後更字尙闇坑田人嘉靖乙丑進士授吉安教諭蒼白鷺書院以居弟子遷國子博士轉南京工部主事歷都水郎中榷關儀真平價懲弊立短載法瘞浮屍置義塚商民德焉尋請告歸世章有至性幼知讓產於兄平生語無緣飾於世味一無嗜好以義方教子弟葉向高言長樂以清脩著者林世章與鄭

長樂縣志

卷二十二

列傳三

三十六

名臣

世威爲最云子裕陽自有傳

乾隆賀志參道光通志

鄭岳字永翰號兼山龍陽人

祖七都華墩

隆慶戊辰進士授華亭令華爲

天下壯邑岳謹篋篋清訟獄息萑苻飭學宮循治稱最時相高拱脩郅徐文貞當事者多以傳會爲能而岳獨否擢諫垣論列侃侃大闢張進廷辱言官岳疏糾之奪一歲俸遂外徙連艱內外孺泣盡孝補粵東兵備蠲煩苛問疾苦山寇猝入程鄉刼其令岳畫策誘戮其魁餘醜遂散河源城圮岳爲徙故城發庾賑之以讒歸蕭然自得居鄉以和約身以儉起參滇南政堅臥不起夏允彞論曰余幼聞諸父老方新鄭相脩郅徐文貞也當事者相傳會致器訟蝟起所訟諸大家無論虛實悉指爲徐氏新鄭去事解當事者率解綬去嗟呼鄭公不狗勢亦足以峻擢視彼屬得失何如哉吾鄉先輩有言豈直有造吾華其爲朝廷扶植紀綱非淺鮮矣○乾隆賀志

陳長祚字以玠一字培所古槐人父瑞兩廣總督晉大司馬常代巡
吳中以多善政再請留一年蓋異數也後以撫楚優擢遂爲長樂
甲族焉長祚登隆慶辛未進士以泌陽令擢兵部郎筦武庫清覈
積羨十五萬有奇立爲歲察之法後以方伯備兵榆林習夷虜情
操縱得宜邊塞晏然官至工部尙書時熹宗兩皇子繼薨疏請合
葬省帑金數萬郎中萬璟彈魏忠賢廷杖垂斃長祚撫之痛諸璫
側目因請歸生平無崖岸捐築斗門以溉南畝里人至今感之兄
長進舉人官同知弟長勉戶部郎中孫翔進士官中書闖賊陷京
慟哭南旋畜歲貢不仕夏允彝論云陳氏之族甲閩中矣公與幼
溪司馬官最達幼溪豁達多大畧其歸也
窮山川之樂公寬然長者居鄉杜門不問外事其致畧殊其重於
朝野則均弇州之序曰是能重族姓非以族姓重者也知言哉卒

長樂縣志

卷二十二 列傳三

三十七

名臣

祀於鄉○
乾隆賀志

謝杰字漢甫江田人幼警敏博學能古文詞登萬歷甲戌進士除行
人册封琉球卻其餽其使人謝仍以餽致杰言於朝返之琉球人
爲立卻金亭擢光祿寺丞歷兩京太常少卿南京歲祀懿文太子
以祠祭官代杰言祝版署御名而使賤者將事於禮爲褻請如哀
冲莊敬二太子例遣列侯帝是之乃用南京五府僉書著爲令累
遷順天府尹平徭均稅以右副都御史巡撫南贛清四弊陳三策
以汰兵之冒者軍民安堵屬吏被薦者以賄謝杰曰賄而後薦干
戈之盜薦而後賄衣冠之盜人以爲名言進南京刑部右侍郎二
十五年春陳十規疏言前此兩宮色養維一今則定省久曠慶賀

亦疏孝安太后發引並不親送前此太廟時享皆躬親今則皆遣代前此經筵臨御聖學日勤今則講官徒設講席久虛前此披星視朝今則高拱深宮累年不出前此歲旱步禱郊壇今則園丘大報久缺齊居宸宮告災亦忘脩省前此四方旱澇多發帑金今則採礦榷稅中使迭出前此用財有節今則歲進月輸而江西之磁江南之紵西蜀之扇關中之絨率取逾額前此樂聞讜言今則封事甫陳嚴綸隨降但經廢棄永不賜環前此撫恤宗室恩義有加今則楚藩被訐中璫旋出以市井奸宄閭骨肉懿親前此官盛任使職無曠官今則大僚屢虛庶官不補是陛下孝親勤政尊祖好學敬天愛民節用聽言親親賢賢皆不克如初矣不報召爲刑部

左侍郎擢戶部尙書督倉場時四方遇災率請改折杰請歲運必三百萬以上方許議折從之三十二年漕運愆期杰憂形於色蚤夜焚香祝天是冬運河冰獨不合漕艘仍如期集朝野異之一日暴卒贈太子少保遣官護喪賜祭葬祀於鄉所著白雲天靈北窗吟稿行於世子汝烈舊志作杰侄以貢生授南平訓導擢始興知縣守正不阿權璫欲採礦其邑汝烈杖而遣之旋棄官歸探通志府志

林裕陽字永光世章叔子萬曆丙子舉人授蒲州學正轉令連山連山本窮壤大璫以礦稅擾諸邑裕陽力爭得減大半擢永寧知州永寧與連州皆雜處夷獠裕陽每貽故人書但言居職勉自樹立初不知爲蠻烟瘴雨鄉也進柳州府同知入爲南戶部郎中筦浦

口屯田以耗米益正支軍民大悅出知臨安府土舍盜賊爲梗裕陽以計禽其魁餘皆歛服李玉李鳳父子糾沅州賊入近郊殺營卒裕陽檄土舍沙源追賊於倘佃俱就戮兵備副使欲盡賊根株裕陽曰某請以撫爲勦卽命騎抵賊巢作簡明歌令耆老譯諭勞以牛酒令歸耕皆羅拜晚宿賊廬酣寢達旦賊跪進食食已又之一巢三日而遍皆就撫或問何以知沙源能辦賊賊旣敗方恨我何以知不害公且就撫曰此易知耳我兵積弱非土舍不能成功沙源往日征南功格於吏吾能直之故爲我盡力首惡旣誅餘黨喪膽蹙之則負固撫之則方慶得生故來也廣南曾儂紹周新襲位頭目欲立其弟紹陽賄當道將許之矣裕陽不可竟復紹周四

長樂縣志

卷二十三

列傳三

三十九

名臣

鄰帖然尋乞歸而奢崇明安邦彥難作拔用沙源累著戰功人服其鑑卒祀於鄉夏允彝論云林公父子之歿也鄭少司寇環浦葉或爲之傳其並祀學宮也陳少司馬幼溪林給諫楚石謝司農繹梅皆序其事以傳數公咸巨人長者非妄稱人者也兩公得此雖由其子孫賢不益足以觀兩公哉
乾隆賀志參道光通志

馬思理字達生一字還初五都人天啓壬戌進士知烏程縣縣賦故重胥吏積蠹其中思理創立清單俾里甲自注納數不施鞭笞而課不負民俗以人命相訐一經官檢其家立碎思理約法先訊後檢訊得誣者立罪之訐風始衰邑中士大夫以文藝來質禮之客館賞奇析疑終日不厭有所干請則正色拒之其所拔識如凌義渠溫璜皆忠節士也遇水旱爲民雩禱必芒屨去蓋或盛夏暴烈

日中請折請振尤懇惻動人上官鑒其誠曰馬君所請何可同他令耶在縣兩值儉歲輸額至七分以上卽止不徵居五年以考最內召鄉民扶老攜穉自郡至吳江界八十里間牽袂環跽獻卮酒思理勉爲舉觴衆泣思理亦泣入京擢兵科給事中崇禎元年命巡視太倉清錢糧數十萬計又巡皇城是時流寇漸熾思理疏言川陝閒無處不報流賊夫民窮爲盜兵逃亦爲盜初未及百耳不及時勦除遂蟻聚以千萬計臣愚以爲勦盜在勦於初起誠急救兵部覈盜起地方酌量立限或三月或五月能如限勦除者卽授不次之擢其有再違經年者實置之法彼如死於法毋寧死於賊有不爲陛下捕賊安民臣不信也帝方英明特簡思理覈邊鎮兵

馬時度支不足而節鎮司閩外者多冒費乾沒糧匱馬空動形支絀驕卒猾弁朋比作奸思理熟九邊形勢以簡練爲主所條三十八議汰金錢三十餘萬厯工科左右給事中巡草廠適巨璫張彝憲總理工戶二部錢糧自尙書以下盡接以屬官禮思理獨不爲屈觸璫怒以草場失火下刑部獄落職未幾起尙寶少卿晉太僕少卿轉右通政以太學生涂仲吉疏救黃道周并下思理獄謫戍久之釋歸邑大饑力請當事發賑全活無算又條陳官鹽及差役之害便民省役邑人建祠祀之流寇陷京師福王立南京起通政未赴唐王稱號再起故官尋遷禮部侍郎進尙書魯王監國紹興以嫌忌互誅使臣思理私謂所知曰光武果至宜陽盆子不當食

均輸耶魯國審能屏蔽東南何故不許為寶融錢珍也吾當見而解之請於唐王奉命至浙抵紹興清兵至魯王遁入海及魯王入閩推思理及熊汝霖入閣嘗薦錢肅範入史館以紀起居魯王敗思理不食卒按南紀畧及錢秉鑑明季錄臺灣記事三藩小錄俱云思理與曹學佺俱自縊李世熊馬母壽序稱為唐王使浙後魯王棄浙從入舟山報命無期遂殉節明書稱以國難蹈海死節義錄稱魯王入閩遁後思理扈從弗及以微疾卒於舟次考節義錄及全祖望撰錢肅樂碑思理於魯王入閩實授閩銜則其死在王入閩以後縣志稱魯王敗不食死與時事相合從之魯王諡曰忠宣清乾隆四十一年賜諡節愍祀於鄉著有玉尺山

房詩選乾隆賀志參道光通志

劉沂春字泗哲一字魯庵澶頭人崇禎甲戌進士知烏程縣前令馬思理政教優粹沂春與同鄉益實心出治士民謂設縣以來惟馬

劉二君不媿民父母遷刑部主事會行人熊開元忤政府下獄勘問沂春持平不少徇政府脅以利害不為動有旨以徇縱覆讞沂春仍執前議不變疏言公道在人心臣讀何書守何法而敢欺君父耶尋罷歸福王時起工部主事唐王時又起布政司參議進太常寺卿唐王敗遁跡不出魯王入閩錢肅樂薦之為副都御史貽書曰時平則高洗耳世亂則樂褰裳司徒女子猶知君父東海婦人尚解奮興嗟呼君等忍負斯言沂春乃就道尋進吏部左侍郎魯王敗沂春屏居出雲巖中當事罕識其面以拂鬱喪明時鄭芝龍父子紛擾見有書閣部劉府者即麾兵去之方安一里咸保全焉著有瓏洞集二十卷出雲巖集十卷年八十餘卒於侯官之鳳

岡祀本縣鄉賢同邑諸生石魁字名海亦以節終

乾隆賀志參
道光通志

清

高龍光字世谷一字紫虹父士選見循良傳龍光順治丁酉舉人已亥進士授浙江台州府推官治獄不避權貴以例裁補廣東茂名知縣除奸宄興學校救荒恤貧諸事脩舉民爲建亭立碑擢戶部主事遷員外郎康熙十七年典試山東所拔皆知名士擢郎中出爲江南鎮江知府屬邑利弊悉爲興除又置救生船十捐田以備脩費民爲立生祠旋督學山西期滿補陝西涼莊道擢布政使檄甫到卒龍光之副主考山東也得孫勳卷謂主試翁叔元曰此名解元也叔元以已得人辭龍光曰若不可姑置爲來科榜首及來

長樂縣志

卷二十三

列傳三

四十二

名臣

科果舉第一

乾隆賀志參
道光通志

陳書字特卿一字葦菴漳港人八歲喪父事母以孝聞好讀書爲文自成一家康熙辛酉舉人授湖廣安仁知縣甫下車適有祀南嶽差革往例以蘇百姓捐千金訪苗俗之詐術者按治之刁風以息九閱月丁內艱歸士民有送至閩界者蒞官淺而感人深若此服闋補四川通江知縣減茶稅革重耗詳免加賦壬午乙酉分校俱稱得人在任八年務德化不事刑威擢刑部廣東司主事遷浙江道監察御史法司會讞多平反壬辰會場內監試風清弊絕巡視中城奸宄訪治殆盡掌登聞院歷掌江南四道事常出獨見所有條奏多稱旨在臺數載賜御製御纂經書佩文韻府等集內申假

歸葬親丁酉復命卒京邸祀楚蜀名宦本縣鄉賢祠

乾隆賀志參道光通志

鄭任鑰字惟啓一字魚門父章字子憲二十都人以進士授山西萬全知縣有善政任鑰其仲子也寄籍侯官康熙乙酉以五經首舉於鄉丙戌成進士由庶常洊歷侍講在京邸與李光地孫嘉淦倡明理學引掖後進五十三年典試江西五十九年視學江南風清弊絕所拔皆知名士福建巡撫潘公思築其一也世廟在潛邸稔其名雍正元年擢湖南布政使調湖北設木櫃示闔屬軍民直言得失條陳利弊餽遺不戒而絕擢巡撫以前所訪利弊次第施行脩江漢書院割俸錢以旌文行優者嘉魚等二十七州縣水災任鑰立請蠲賑預以養廉千金倡之全活無算權湖廣總督討湖南

逆賊謝錄正等密授機宜逆黨立平召入掌副都御史旋往江南查倉穀民賴之建祠祀焉尋被議回籍卒於杭州著有樂善述畧自治要纂朱子或問小註古文正宗萊州詩集子念盥雍正甲辰舉人念榮乾隆庚午舉人武平教諭遷邵武府教授

乾隆賀志參道光通志

吳文煥字觀侯一字劍虹父士宏見節概傳康熙甲午文煥以五經舉於鄉辛丑進士殿試第二人授編脩天性孝友以親未葬及長兄九如終於諸生每念之泣下乞假歸家居十載無宦情與兄弟猶子輩日評論詩古文辭雍正四年補原官十年典試陝西稱得士改刑部員外郎讞獄多平反遷禮部精膳司郎中除湖廣道監察御史皆有聲翰林院落成賜宴瀛臺預賦栢梁體詩又和御製

七律八首稱旨年未六十謝病歸卒於家文煥居臺諫剛正不撓
歸日鍵戶不妄接一人舊廬狹隘四壁蕭然處之晏如詩豪爽近
蘇陸建寧鄭方坤采入詩鈔

乾隆賀志參
道光通志

陳化龍字豐有一字劍城古槐人省居乾隆壬辰進士授兵部主事
兼職方司馬館監督時有甘肅逆回之役軍士取馬於館化龍預
爲部署衆以無譁轉員外郎改御史監察江西巡視東城擢刑科
掌印給事中有指揮某倚勢溺職特疏參論如法奉命稽查興平
儲濟諸倉漕綜覈維謹後大臣糾劾積弊賠累者甚多化龍獨無
與在掖垣二十年奏事不激不隨旋引年歸當事聘主鰲峰書院
講席獎才雋重實學非公事片刺不入公門有年家子某來督閩

長樂縣志

卷二十三

列傳三

四十四

名臣

學欲物色化龍諸子力卻之巡撫李殿圖語學政趙佑曰吾閩人
多矣未有守禮自重如陳山長者其見矜式如是卒年七十七祀
鰲峰名師祠著有歸山吟詩草子爲漢字道霖嘉慶戊午舉人候
選教諭金漢字道濱一字袖石乾隆乙卯舉人皆有文名金漢歷
任寧德鳳山安溪教諭直隸行唐知縣調平谷所至守清慎勤三
字弗諼尤工詩著西行詩帙海外近作等編

同治
彭志

梁上國字斯儀一字九山江田人父劍華字天池郡諸生以耆宿教
授里中垂五十年門下士多成偉器劍華生五子長上寶邑諸生
次贊圖三上泰四卽上國贊圖初名上治字翼齋與上國同舉乾
隆戊子鄉薦咸安宮教習以知縣用呈改教職補寧化縣教諭善

課士值大水佐縣賑撫多所全活上泰字岱巖乾隆乙酉鄉薦選貴州餘慶知縣有循聲上國贊圖上泰同爲太傅朱珪所賞識入讀書社上國乾隆乙未成進士選庶吉士習國書散館改除相國于敏中惜其才請仍留庶吉士學習旋丁母憂服闋以父疾乞養復丁外艱五十五年再散館授編脩分校鄉會試轉御史給事中歷奉天府府丞兼提督學政嘉慶十二年遷詹事府少詹事累擢至太常寺卿上國通經知時事凡當世之急務鄉里之利病無不旁求博訪居官多所建白其陳奏本省事宜尤詳明剴切閩南奸民結黨通兵役號天地會蔓延他郡肆抄掠有司匿不聞上國從鄉人訪得其實疏請飭大吏密察掩捕獲其渠餘黨解散一方賴

以安臺灣噶瑪蘭地方居淡水廳之北艋舺之東三貂山之南屢爲洋匪蔡牽朱潰所覬覦淡水同知徐夢麟始議開墾知臺灣府楊廷理繼之而大吏憚於舉行議屢格上國乃疏曰噶瑪蘭地勢平曠北西南三面皆山惟東面臨海海口有洲嶼蔽之其北隅有港曰烏石港南隅有港曰蘇畧港兩港之船可自爲出入不必與臺郡相聞其閒田土豐饒居民不少其水有三溪分流中大溪爲南北之界其北境由烏石港入者自北而南有頭圍二圍三圍四圍五圍近年又增六圍左右小圍無數皆居民所建築以自保固者六圍南九里至大溪逾溪卽其南境南境較大於北境而墾田築圍尙少近北之溪洲築小圍四迤南二十里有大圍名羅東社

皆內地人民占居者南北之地可由烏石蘇畧直入是以賊屢窺伺欲得其地爲負隅計夫其地未入於版圖其人遂域於化外萬一不能自守淪爲賊巢恐海洋從茲多事矣考雍正元年收諸羅縣之北地增置彰化一縣淡水一廳雍正九年又增置彰化縣屬巡檢二員淡水廳巡檢二員今噶瑪蘭之地宜遵雍正元年九年之例收而撫之則海疆之獲益有四一以絕盜賊覬覦之患嘉慶十一年海寇蔡牽欲奪頭圍地船至烏石港其居人吳姓率番民禦之牽給之曰吾但求得地爲耕種計於爾無傷吳姓曰果爾則盍焚汝舟不聽率衆登岸吳民擒縛數人賊潰去十二年海寇朱潰又以賊舟入蘇畧奸民李祐黃灶陰與通焉適有官兵從山路

入與居民協力抵禦李祐逃入賊舟黃灶被縛潰以十六舟遁去夫噶瑪蘭從前出入人少莫知虛實今則入居者衆人人傳說無不周知惟有早行收撫絕負隅之妄想則羣賊盡失所望而地方自能綏靖矣一以使海疆無化外之噶民噶瑪蘭自許拔爲夥長後有吳沙者董理各圍之事衆目爲頭家沙死子光裔不得衆心於是北境董事者柯有成陳奠邦何檜賴岳吳化與光裔共六家其南境之溪洲及羅東社則潘賢文獨據之又有林永福翁清和爲義民之首當朱逆來據蘇畧時林永福率民番穿山關路迎接我水師於畧外賊乃退走夫以朱逆猖獗之勢而潘賢文林永福能率衆拒之可謂知大義矣既能知義卽當早爲收撫况證以普天

率土之義亦未便委棄之以爲賊有也一以使全臺增土田之利噶瑪蘭田地南境闕於北境而居人則北境倍多者蓋由北山穿入程途獨近也北境之地嘉慶八年以賽神籍男女六萬口尙有餘田則知南境墾耕其利賴當更廣矣惟地廣無人野番出入爲上者必先布置村落設營汛奠民居而後及農畝則有官吏有兵防民就墾如歸市立致萬家不召自來而番害亦不待驅而自息矣一以使番社懷朝廷之德雍正初年總督滿保言臺灣南北二路生番自古未通聲教近見內附熟番輕徭薄賦亦莫不願附編氓應令其照舊居處並令文官加意撫卹所報丁口附入版圖勿事編查順其不識不知之性每年願納鹿皮折銀代賦聽其輸納

就臺充餉今噶瑪蘭番社北境二十三南境十二北境居民轉多於南者足以見番民並居兩不相礙也况朝廷以恩意招徠之以良法綏定之番墾者歸番民墾者給民番民所未墾者官爲屯田則番民輯睦上下和同臺疆將利賴無窮矣疏入上令督撫議之十六年總督汪志伊巡撫張師誠乃定議丈田地置官司焉嘉慶十八年督學廣西剔弊習黜浮詭以勞成疾卒於慶遠試院年六十八既歸葬太史陳壽祺爲誌其墓所著有駁閻氏尙書古文疏證五卷駁毛氏大學證文一卷奏疏一卷進御詩文一卷山左游記一卷遼瀋游記一卷山右游記一卷粵西游記一卷詩文集十餘卷子雲銑乾隆乙卯舉人雲鑲附貢生雲鏞嘉慶己卯舉人福

寧府學教授

同治彭志參
道光通志

陳學穎榜名筆鋒後以字行別字蓮石晚號韜園石門人乾隆乙未會魁觀政工部己酉典廣東鄉試適正考官道卒學穎獨掌文衡所得多知名士旋由本部郎中京察一等授山西鴈平道絕苞苴峻風節屬邑有蠹吏設驛馬行商賈病之控於學穎吏懼納貲請贖學穎不允治其罪立碑示禁建斗山書院延名師增膏伙以課諸生值朝廷西巡一切供帳不侵官不擾民以母老乞歸養留別士民詩云爾有室家吾有母太平同此樂熙熙丁母艱服除分發陝西鳳邠道時秦地用兵在大營贊理軍務事竣引疾歸居林下二十餘年不出里門以維持風俗爲任捐祭田脩族譜睦鄉鄰培

長樂縣志

卷二十三 列傳三

四十八

名臣

後進歲歉則散所餘穀減價平糶日臨摹名帖積十餘卷顏曰稀餘堂翰墨求書者常屨滿戶外尺幅寸箋寶若拱璧臨卒前一月豫撰墓誌自稱性鈍樸少機警快口直腸胸無城府在部曹恪守繩墨不知有營求事有以識風尚諷者輒笑頷之出膺外吏弗求表異惟職司觀察顧名思義用自警省噫名臣風度於其自道見之矣年七十九卒著有韜園詩集子誦嘉慶戊午舉人孫藹咸豐

辛亥亞魁

同治彭志參
道光通志

游光繹字彤占一字礪田先世由感恩遷霞浦家焉父晟字旭軒歲貢生兄光纘乾隆庚子進士歷任福州興化臺灣教授光繹與兄切劘爲學乾隆癸卯舉於鄉己酉成進士改庶常授職編修卽教

習庶吉士再爲順天鄉試分校嘉慶四年擢陝西道監察御史光
繹既居言路思建言以盡職是時仁宗親政勵精圖治官吏屢更
光繹上疏言治世之道莫要於用人用人之方在崇久任守令固
宜久任卽督撫藩臬亦然蓋久其地則官吏之能否風俗之淳漓
無不周知其所措施十得八九若官旣屢遷送舊迎新每滋勞費
而蠹胥猾吏恒於新舊交接之際因緣爲奸不惟無益於治且有
損請各省大員非必不可已者無輒更調有遷擢卽在原省庶可
收駕輕就熟之效至於守令牧民者也民不得所罪在守令今諸
督撫於下屬劣員未必盡知知之往往好爲含容且凡署事之員
督撫多不爲意卽有劣蹟不過撤回彼一署事輒敢妄行異時實

授焉能潔己願嚴飭各督撫先使不肖之吏屏斥務盡庶吏治肅
清民生有賴又州縣所爲知府具知之第有所需於州縣州縣因
得挾之以爲利雖有劣蹟知府亦不能舉發願隆知府之選庶可
以清州縣之弊又言皇上勤求治理固宜家給人足比隆三代而
民生未厚風俗未淳水旱時聞潢池未靖公卿雖能供職而未見
爲上爲下之誠督撫雖云辦公而罕見有守有爲之實營伍安於
廢弛而嚴明者無多州郡習於繭絲而保障者蓋少又疏論君德
當以魏徵十漸爲戒反覆千餘言上嘉其鯁直未幾巡視西城每
有訊鞠不輕鞭朴然懲奸不少貸妖民程德挾採生術枋賣鄉閭
失小兒以百數光繹偵捕奏戮於市百姓稱快通州水上命大臣

往勘災當卽發賑若往返需時日民不及待請使者得便宜行事久之有天津賞郎某以年資遷內閣侍讀學士光繹乃疏爭謂某捐貲出身人品庸下不滿衆望不可以玷清班且言以年勞得官無異於傭之計日受直賢者無以自異不肖者得以倖進非所以鼓勵人才疏入上以言官持銓政近明季科道氣習下部議既復諭曰游光繹以京堂官不宜徇資格言固當第措詞失檢以後京堂須用保舉定爲例而部議已奪官諸同年生惜其去謀爲捐復光繹不可遂歸時年四十有五玉制軍延主鼇峰書院光繹非公事未嘗脩謁前師鄭光策以嚴肅爲教光繹繼之獨解棄束縛飲人以和人亦無敢干以私者時陝西爲故巡撫董教增題祀名宦

陝撫某移書閩中照辦總督趙慎畛博詢紳士咸以爲可欲得光繹一言爲決光繹曰陝西自可名宦閩中何必從同事乃止其爲大僚所敬憚如此光繹性孝友事父及繼母備極色養光繹教授興化猝得疾光繹聞馳問親視湯藥及卒護其喪歸工行楷書瘦勁自成一家諸城劉相國墉極稱之少好學老而不倦嘗以炳燭顏其齋年七十卒子大琛道光丙戌進士官山西高平知縣大廉道光庚子舉人入原籍

同治彭志參
道光通志

陳文翥字彥超一字秋丞古槐人省居初籍閩縣後歸籍長樂道光乙酉與父壽仁同舉於鄉癸巳會魁改庶吉士散館授編脩丁酉典試貴州所得士多名宿以拔貢生聯捷者十二人貴州人謂是

科人文之盛爲二百年所未有己亥補江南道御史上疏言州縣陰縱差役之弊督撫回護州縣之弊上皆許可召見兩次又疏陳東南直省時弊千餘言未上以病卒文翥才堪大用而得年僅踰

壯朝野惜之

同治彭志

鄭元璧字用蒼一字錫侯榕三子道光庚子進士改庶吉士丁生母憂旋里時夷氛正熾全閩震動偕當事密籌方畧衆以無恐服闋授編脩庚戌補陝西道御史甫履任卽彈劾夷務不避權貴旋以母艱歸主講鳳池書院訓士有方值土匪不靖會同地方官勸辦捐輸團練戊午粵匪竄上游慶制軍端奏請偕赴延平以勞績保道員賞戴花翎己未授湖南長寶道所轄益陽湘陰二縣每春水

長樂縣志

卷二十三

列傳三

五十一

名臣

盛漲常有漫隄之患飭屬勘脩堅固民利賴之時方事東征大府委以籌餉局務設法招徠商販定釐稅濟軍需並協助鄰省其後士馬飽騰金陵克復賴接濟餉銀力也楚省求忠書院少藏書特捐購羣籍以資諸生討論辛酉署糧道篆改辦漕折嚴禁浮勒署臬篆用法持平所獲匪黨必悉心審鞫從不株連全活甚衆尋擢山東鹽運使司未赴任以勞瘁卒於官疾篤時憚撫軍嘗親至榻前問視見敝帷布被不異寒素出語人曰吾不意其清儉如此年

五十九

同治彭志

林天齡字受恒號錫三成豐庚申進士歷官翰林院編脩侍講侍讀侍講學士詹事府左右春坊贊善左春坊右庶子侍讀學士署國

子監祭酒父經光嘉慶己卯舉人官貴州安化永從餘慶知縣署開州知州黎平府知府性清鯁好施濟輒以廉俸贍親族年未六十棄官歸里宦橐蕭然天齡幼穎悟過人讀書目數行下十歲嫻韻語習帖括卓然成篇旋丁外艱家徒壁立同里陳孝廉學瀾方設館授徒諭其才而知其未能具脩脯也亟招之學爲供膏火曰林生豈長貧賤哉且字以女十八歲補博士弟子員以詩賦見知於長洲彭學使蘊章學使授以儒門法語勗之曰士先器識而後文藝願子以理學名不以文章名也天齡於是始博覽先儒傳註語錄研求存養所造於姚江爲近嘗曰陽明之學煞是簡明但非天資絕頂人參不透耳又曰主敬主靜祇是一路必須從敬邊下

手方不墜禪門宗旨程朱之說到底無弊時閩中英雋結南社以詩文相切劘天齡與社中楊叔懌郭式昌陳適祺

皆庚寅

年生稱五虎嘗摘楚詞唯庚寅吾以降句合刻印文風流文采炤耀一時通籍後瀋陽相國倭仁深器重之每與縱論古今學術之得失性命身心之奧聖賢體用本末之分天齡多所發明尤以擬治安策三篇爲相國所歎賞特疏薦入上書房授孚郡王惠親王二王子讀尋命在弘德殿行走以學問疏淺且素患痰嗽日侍講幄恐失儀具疏辭時穆宗冲齡兩宮訓政召見便殿溫諭諄諄天齡不敢再有陳請力疾入直寒暑無間穆宗每數日必問曰汝痰嗽好否宜調養勿過勞旣而大婚禮成穆宗親政天齡疏列十餘

條最要爲勤聖學保聖躬罷土木與同直僉名以進皆切直動聽其典試江南也卷帙繁富正考官侍郎銘安素多病不耐操勞天齡悉心校閱目不停覽手不停披者月餘所取多積學者宿士論翕然視學山右試日坐堂皇關防嚴肅飯盃茶銚皆親查驗遇佳文有疑竇者則面試以決去留其有議論突梟者文或未純概從錄取曰其文如此其人必非庸庸甄之可爲國家收一得之用棄之將牢騷抑鬱不入於放誕一流則將肆其狂妄不羈而習爲桀驁之行其成就人才深意如此嗣視學江南如使晉時持法極嚴而待士較寬務以養其廉恥爲重刊尙書湯斌志學會約侍講彭定求儒門法語分給諸生勗以敦品植行奏准太倉陸世儀從祀

兩廡謂崇化勵俗必以表揚前哲爲先賓興年列賢書者例赴學政衙門填寫親供達部胥役需索積弊革除一清輶車所至務戒供億之煩試事雖在病中不輕假手按松江疾甚僉請還署不允請停考亦不允疾篤左右扶掖登牀方展衾褥已趺坐而卒卒之日猶親書試題手校試卷也蘇撫吳文炳以狀聞予祭葬賞次子開棻舉人宣統三年蘇撫程德全奏准入祀名宦祠並將生平事實宣付國史館立傳